



Katika Mikono ya Baba

Ninapaa kwenda kwa Baba yangu naye ni Baba yenu, kwa Mungu wangu naye ni Mungu wenu.—**Yohana 20:17.**

Kabla ya kuweka misingi ya dunia Baba na Mwana walikuwa wameungana katika agano la kumkomboa mwanadamu ikiwa atashindwa na Shetani. Walishikana mikono wakaahidi kuwa Kristo atakuwa dhamana kwa jamii ya wanadamu. Kristo alikuwa ameitimiza ahadi hii. Pale msalabani Kristo aliposema “Imekwisha,” alikuwa akimwambia Baba yake. Mapatano yametekelezwa kikamilifu. Na sasa akatamka: Baba, Imekwisha. Nimefanya mapenzi Yako; Ee Mungu Wangu. Nimekamilisha kazi ya ukombozi. Kama haki yako imetimizwa, “Hao ulionipa nataka wawe pamoja nami po pote nilipo” (Yohana 19:30; 17:24).

Sauti ya Mungu inasikika ikitangaza kwamba haki imekidhiwa. Shetani ameshindwa kabisa. Wafuasi wa Kristo wanaotaabika na kujitahidi duniani wamekubalika “Katika huyo Mpendwa” (Waefeso 1:6). Mbele ya malaika wa mbinguni na wawakilishi wa malimwengu ambayo hayakuanguka, wanatangazwa kuhesabiwa haki. Pale alipo, hapo kanisa Lake litakuwapo. “Fadhili na kweli zimekutana, Haki na amani zimebusiana” (Zaburi 85:10). Mikono ya Baba ikamkumbatia Mwanawe, na tamko likatolewa: “Na wamsujudu Malaika wote wa Mungu” (Waebrania 1:6).

Kwa furaha isiyotamkika, watawala na wakuu na mamlaka wanakiri ukuu wa Mfalme wa uzima. Jeshi la malaika wanaanguka kifudufudi mbele Zake, huku kelele za furaha zikijaza mbingu, “Astahili Mwana-Kondoo aliyechinjwa, kuupokea uweza na utajiri na hekima na nguvu na heshima na utukufu na baraka” (Ufunuo 5:12).

Nyimbo za ushindi zinachanganyika pamoja na muziki kutoka katika vinubi vya malaika, hadi mbingu inaonekana kujazwa kwa furaha, na sifa. Upendo umeshinda. Mpotevu amepatikana. Sauti zikajaa tele mbinguni zikitangaza kwa sauti nzuri zikisema: “Baraka na heshima na utukufu na uweza una Yeye aketiye juu ya kiti cha enzi, na yeye Mwana Kondoo, hata milele na milele” (aya ya 13).

Kutoka katika tukio hilo la furaha, mwangwi wa maneno ya kupendeza ya Kristo yanaturudia huku duniani, “Ninapaa kwenda kwa Baba yangu, Naye ni Baba yenu, kwa Mungu wangu Naye ni Mungu wenu” (Yohana 20:17). Familia ya mbinguni na familia ya duniani ni moja. Kwa ajili yetu Bwana wetu alipaa, na kwa ajili yetu Anaishi. “Naye kwa sababu hii, aweza kuwaokoa kabisa wao wamjiao Mungu kwa yeye, maana yu hai siku zote ili awaombe” (Waebrania 7:25) (Tumaini la Vizazi Vyote, sehemu ya 2, uk. 447–448).